

29 MAY 1999

Samy-Ladang

MIC AKAN TERUS PERJUANG NASIB PEKERJA LADANG, KATA SAMY VELLU

SHAH ALAM, 29 Mei (Bernama) -- Presiden MIC Datuk Seri S.Samy Vellu hari ini memberi jaminan bahawa MIC akan terus memperjuangkan hak pekerja-pekerja ladang di peringkat Jemaah Menteri dan bukan melalui demonstrasi atau sebagainya.

"Saya berjanji MIC akan terus memperjuangkan hak pekerja-pekerja ladang sehingga kita berjaya menebus maruah mereka," kata beliau ketika merasmikan Konvensyen MIC Selangor di sini.

Beliau berkata MIC akan memperjuangkan hak pekerja-pekerja ladang melalui saluran Barisan Nasional (BN).

Katanya, sejak permulaan abad ini, masyarakat India kekurangan infrastruktur yang sempurna untuk membolehkan mereka mempertingkatkan keadaan sosial, ekonomi dan pendidikan mereka.

"Sementara masyarakat Malaysia yang lain sibuk memaju dan memperkembangkan keadaan infrastruktur sosial dan ekonomi mereka, kita pula sibuk dengan perjuangan kelangsungan hidup sebagai buruh bergaji harian dengan tiada ketentuan arah.

"Sementara kaum lain sedang mencari peluang-peluang untuk kemajuan sosial dan ekonomi, kita pula sibuk memperjuangkan gaji bulanan yang diwarisi turun temurun daripada penjajah yang tidak mahu menerima kaum buruh ladang sebagai manusia biasa," kata Samy Vellu, yang juga Menteri Kerja Raya.

Beliau juga berkata masyarakat India tidak harus lupa bahawa masa depan mereka terletak di tangan BN dan kepimpinannya.

"Kita gembira kerana kita dipimpin oleh Perdana Menteri Datuk Seri Dr Mahathir Mohamad yang menjadi sumber inspirasi bagi perpaduan dan kestabilan negara," katanya.

Samy Vellu berkata setelah bekerja dengan Dr Mahathir sepanjang 18 tahun lalu, "Saya mengaku bahawa beliau sentiasa mendapatkan persetujuan setiap anggota Kabinet berhubung semua isu dan bersedia menghadapi sebarang kemungkinan akibat daripada tindakan beraninya itu."

"Hari ini kita melihat elemen-elemen tidak berpuas hati yang telah menikmati manfaat daripada kepimpinan Dr Mahathir, cuba menjejaskan keyakinan dan kepercayaan rakyat terhadap kepimpinannya," katanya.

Beliau berkata elemen-elemen itu merancang untuk mewujudkan ketegangan dan kebimbangan di kalangan rakyat menerusi pemikiran sempit mereka dan enggan memahami sudut pandangan yang berbeza dan pencapaian perdana menteri.

"Saya menggesa masyarakat India Malaysia supaya tidak terpengaruh dengan elemen-elemen itu, sebaliknya mencari kebenaran dan mengenalpasti ilusi yang mencetuskan kebimbangan itu di kalangan rakyat biasa," katanya.

Mengenai MIC, Samy Vellu berkata beliau bercita-cita melihat MIC menjadi sebuah pertubuhan yang kreatif yang mampu mencetuskan satu pasukan yang kreatif di kalangan pemimpinnya.

-- BERNAMA

ES AKD